

13/07/1998

Komponen BN diingat mainkan fungsi positif

GEORGETOWN, Ahad - Ahli komponen parti dalam Barisan Nasional (BN) Pulau Pinang diingatkan terus memainkan peranan positif dalam membantu kerajaan menghadapi kegawatan ekonomi.

Ketua Menteri, Tan Sri Dr Koh Tsu Koon, berkata semua parti komponen terbabit perlu memberi sokongan padu terhadap setiap langkah yang diambil pucuk pimpinan negara khususnya Perdana Menteri, Datuk Seri Mahathir Mohamad dan Timbalan Perdana Menteri, Datuk Seri Anwar Ibrahim.

Dr Koh yang juga Pengerusi BN negeri, berkata akibat kegawatan mungkin ada pihak yang menjadi tidak sabar dan kurang bertoleransi dalam menghadapi sesuatu situasi.

"Walaupun kek ekonomi semakin kecil berbanding beberapa tahun lalu, namun kerjasama dan perpaduan antara rakyat perlu diperkukuhkan," katanya ketika di majlis perasmian konvensyen Parti Progresif Penduduk Malaysia (PPP) Pulau Pinang, di sebuah hotel di sini hari ini.

Turut hadir di konvensyen itu, Presiden PPP, Datuk M Kayveas, Setiausaha Agung PPP, Datuk Dr Mohamad Ashfar Ali dan Pengerusi PPP Pulau Pinang, Dr Loga Bala Mohan.

Dr Koh berkata, adalah tidak wajar rakyat melupakan kesenangan yang pernah dinikmati masa lalu dan menjadi gelisah ketika negara menghadapi kegawatan.

"Krisis ekonomi yang dihadapi negara ketika ini adalah cabaran paling getir yang perlu ditangani dan dihadapi bersama oleh setiap ahli parti komponen BN," katanya.

Bagaimanapun, katanya, semangat perpaduan tinggi yang ditunjukkan oleh ahli parti komponen BN dan rakyat negeri ini berjaya mengelakkan perpecahan seperti yang berlaku di beberapa negara lain.

Menurutnya, kejayaan itu diperolehi daripada keupayaan masyarakat berbilang kaum di negara ini mengatasi perbezaan masing-masing dengan mempunyai matlamat yang sama berdasarkan kepada satu wawasan dan prinsip rukun negara.

Katanya, tugas memastikan perpaduan itu berterusan kini menjadi lebih mencabar berikutan kegawatan yang dihadapi.

(END)